

მოსმენა - Audition - Слушание

სმენით მოდალობაში მეტ-ნაკლებად მიზანმიმართული აღქმისა და ესთეტიკური გრძნობის ერთობლივი ქმედება; მიზანმიმართული აღქმა აღქმულის ესთეტიკური განცდისა და სიამოვნების, ანდა ესთეტიკური შეფასების მიზნით. ყველაზე მკაფიო მაგალითებია მუსიკის ან ბუნების ხმების მ. ხოლო მაგ., ლექციის მოსმენა, არსებითად, დაკვირვებას განეკუთვნება, ისევე როგორც შემეცნებითი ტექსტის წაკითხვა – მათში მთავარია არა აღქმა, არამედ აზროვნება.

უბრალო სმენითი აღქმისგან, გაგონებისგან განსხვავებით, მ ქცევის ფორმაა, რადგან აქვს საკუთარი მოთხოვნილება. ქართული ენა კარგად განასხვავებს: მომესმა (არაა ქცევა, რადგან სუბიექტი პასიური მიმღებია) / მოვისმინე (სუბიექტი აქტიურია, სათანადო მოთხოვნილება ამოძრავებს, ამიტომ ქცევაა). მ-ს ზოგჯერ ერთვის მიზანმიმართული აღქმის სხვა სახეობა: თვალყურება (მაგ., ცეკვის ან ფილმის ყურებისას), ან დაგემოვნება (მაგ., კაფე-ბარში). ლიტერატურული ნაწარმოების მოსმენისას მთავარია არა მ, არამედ გააზრება და ესთეტიკური გრძნობა.